

Hostaldenbrücke 07. 11. 2024

Mir si bi schönem Wätter pär Gruppebillett nach Frutige greiset.

Nacheme Dorfrundgang heimer wohl e Beckerei gfunde, aber die hei zweni Gipfeli gha und d Apoteg näbedran het kener Turezielfinder - Tablete gha, isch ja klar weme ke ärztlechi Verordnig bisech het. So heimer du die Bekerei Ryter mit Search.ch und Swisstopo gfunde. E schöne Ort, für sone Kaffee u Gipfeli - Halt, nächär het üsi Oberleiterin der Ifädler der Engschtlige nah gfunde. No es merci a dä Öper, wo die Rundi zahlt het. So simer du zimli difig los glüffe, Gottlob hets diversi Holzkunschtwärch unterwägs gha, wo eim zum Beschtune i glade hei, so hetme wider chönne ufhole. Es isch so schön u warm worde, dasme d Unternäbu – Chleider het chönne abzieh. Gli simer dere Hängebrügg necher cho u hei feschtgestellt, dass si guet fixiert isch und no e Überschlagsicherig het. 10 Meter Abstand si a gäh, sicher guet so wes no Gägeverkehr het. Me het e schöne Usblick uf dä Flusslouf und gäbig für die Lüt u Chind, wo no id Schuel oder für Ychöif underwägs si. No zu de Maas: d Brügg isch 153 m läng u 35 m überen Grund, la boue hetse der Wirt sälber u er betriht no e Polschtere, de muesch de scho luege we so miteme Ychouf über die Brügg muesch.

Äbe änet dere Seilbrügg betriht dä Wirt no es Beizli, wos so nes guetz Fondü gäh het u mir hei das Hüsli grad gfüllt. Es si no vier elteri SAC`ler der zue cho. Jedefals heimers gmütlech gha u es isch ou e gueti u fründlechi Bedienig gsi. Derzu si mir vernäblete Seeländer wider einisch mit Sunne verwöhnt worde.

Üsi Sylvia het einisch meh, e mit Überraschige gschpickti Tur düregfüert, es isch immer schön mit dir underwägs z si.

Lg. Fritz